

1. Mund

«Memia blers uffants e giuvenils, povers sco er ritgs, pateschan da problems psichics. Questa crisa acuta n'enconuscha naginas barrieras e nagins cunfins. Ella sa mussa en ina frequenza alarmanta da mutilaziuns da sasez, da suicidis e da stadis da tema d'uffants e da giuvenils sin tut il mund», deplorescha la directura executiva da l'Ovra d'agid per uffants da las Naziuns Unidas (UNICEF) Henrietta Fore.

Quasi 20 % dals giuvenils sin tut il mund pateschan da disturbis psichics, ed il suicidi è la raschun da la mort la segund frequenta tar persunas da 15 fin 19 onns. «Memia paucs uffants han access a programs, cun ils quals els pon emprender da vegnir a frida cun emoziuns difficilas. Mo fitg paucs uffants ch'èn pertutgads da disturbis psichics han access als servetschs d'agid ch'els dovran», ha punctuà il directur general da la WHO dr. Tedros Adhanom Ghebreyesus ed ha declarà: «Quai sto sa midar.»

Tenor la UNICEF cumenza la mesadad da tut ils disturbis psichics avant che cuntanscher il 14avel onn da vegliadetgna. Pervia da quai stuain nus elavurar urgentamain strategias innovativas per prevegnir a tals, per percorscher tals e per als tractar ad ura, sch'i fa da basegn.

Info da la ONU, 5 da november 2019

2. Stadis Unids da l'America

Una nova malsogna da noss temp è il sindrom dal deficit da la natira ch'è oriundamain vegnì chaschunà da la vita sedentara. «En il decurs dals ultims 30 onns è il territori, en il qual uffants pon sa trategnair e giugar senza esser survegliads directamain da lur geniturs, sa reduci per 90 %. Vitiers vegn il boom da las tecnologias novas che furman in ulteriur stimol per giuvenils e per persunas creschidas da betg sortir da la chasa. Tenor in artitgel da la gasetta Le Monde passentan uffants dad 8 fin 18 onns en ils Stadis Unids da l'America mintga di passa 7,5 uras davant in monitor. Ils problems da sanadad che resultan da quai èn multifars: iperactivitad, augment dal pais, pressiun dal sang auta, diabetes, asma, depressiun – e la glista sa lascha bain cuntinuar.

Edeni.fr, 5 da november 2019

3. Madagascar

Edith Ramamonjisoa, manadra dal project «Furmaziun inclusiva», tematisescha las sfidas d'ina instrucziun per uffants cun impediments: «Numerus da quests uffants vegnan anc adina zuppads da lur geniturs, perquai ch'els vegnan savens refusads da la communitad che tema – per mancanza d'ina meglra savida – che auters uffants pudessan vegnir infectads cun l'impediment. Blers Madagascs crain er che uffants cun in impediment corporal sajan er impedids spiertalmain e pervia da quai betg en cas da suandar l'instrucziun en scola. Tenor la plattafurma da las federaziuns da persunas impedidas (in'organisaziun madagasca) frequenta main che 1 % dad els ina scola.

Handicap International, 2014

4. Grezia

Il fanadur 2019 ha la regenza greca bloccà l'access al provediment da la sanadad public per ils passa 55 000 requirents d'asil ed umans senza documents ch'èn vegnids en Grezia. En il champ da fugitivs Moria sin l'insla Lesbos vegn pervia da quai refusà intenziunadamain mintga provediment medicinal a 140 uffants fermamain malsauns. L'organisaziun Medis senza cunfins (MSF) appellescha a la regenza, da prender mesiras en vista a quests cas d'urgenza e d'evacuar tut ils uffants grevamain malsauns sin la terra ferma greca ed en ils stadis commembers da la UE, per ch'els possian survegnir ils tractaments necessaris.

Medis senza cunfins, 20 da schaner 2020

5. Palestina

Mintga pazient che traversa en in'ambulanza palestinaisa in punct da controlla (checkpoint) en Gerusalem d'ost sto midar da l'ambulanza palestinaisa registrada en in'ambulanza israeliana. Quest proceder chaschuna retardaments (il viadi sur il cunfin dura uschia fin a tschintg giadas pli ditg che uschiglio) e chaschuna ristgas da sanadad per ils pazients ch'èn mintgatant en in stadi critic. Els ston ir a pe u en la sutga cun rodas d'ina ambulanza a l'autra. Per il bainstar e per il dretg da sanadad dals Palestinais èsi indispensabel che ambulanzas hajan liber access als ospitals.

Medical Aid for Palestinians, 24 da mars 2016

6. Maroc

Arrestà pervia d'in bitsch. «Dus giuvenils èn vegnids traplads sin il tetg d'ina chasa en il quartier Hay Mohammadi, co ch'els sa bitschavan e sa branclavan. Insatgi als aveva fotografà e tramess il maletg a la famiglia che ha sin quai infurmà la polizia.» Sin basa da l'artitgel 489 dal Cudesch penal che condemna l'omosexualitad, smanatscha als dus giuvenils in chasti da praschun tranter 6 mais e 3 onns.

Léa Baron, TV5MONDE, november 2016

7. India

Schebain che la mortalitad d'uffants ha pudì vegnir reducida per la mesadad dapi ils onns 1980, è ella anc adina auta cumpareglia cun ils auters novs pajais industrials. Quests mortoris evitablas, per exempel cumplacziuns en cas da naschientschas prematuras, infecziuns da las vias respiratoricas sco puntgas u malcostas e malsognas diarreticas. Tar il grond dumber da mortoris d'umans giuvens vegnan anc vitiers las consequenzas tardivas restantas d'ina alimentaziun manglusa da las mammas e da lur uffants. La sutalimentaziun è ina ristga da sanadad per la vita futura, perquai ch'ella retardescha il svilup corporal e spiertal. Qua stoi er vegnir menziunà che mo 16 % da las chasadas indicas inditga d'avair access a las prestaziuns gratuitas u per part gratuitas dal provediment da sanadad public.

Etudes économiques de l'OCDE, 2014/17 (no 17)

8. Bangladesch

En l'ost da Dhaka sa mussa Hazaribag sco ina varicla trida, la quala ins guntgescha pli gugent. Situà a la riva dal flum vegn il quartier tissientà mintga di cun bundant 15 000 meters cubics products toxics, che las 270 cuntscharias e tenscharias domiciliadas qua spidan ora. Las auas persas contaminadas da las substanzas toxicas, ils auments che sa decumponan ed ils excrements umans vegnan deviads en batschigls da retenziun en ils quartiers dals povers. Pervia da quai è la malsogna da la disenteria en il Bangladesch ina chausa normala ed er autras malsognas sa mussan en massa: problems da las vias respiratoricas, problems da la pel, infecziuns, mellania. Ellas tuttas resultan dal fatg che quartiers entirs vegnan stentschentads. Cunter quai sa revoltan invanamain protecturs da l'ambient sin tut il mund.

Zeppelin.geo.com, data betg disponibla